

劉

孟

塗

集

孟塗後集卷十九

桐城劉開明東

將游池陽別內

征鞍未冷又風塵惜別珍留片刻春慈母有兒長曠職衰門賴  
汝善支貧倦游已盡江山勝久客纔知骨肉真爲報此行歸最  
早邇來王粲耻依人

安徽學使胡書農先生以七言長句見題拙集

卽用集中題陳雪香

司空贊書圖韻賦此奉和

先生相遍天下士手網珊瑚搜海市冰鏡照處江天寒百尺瑤  
壇今建此仙風浩渺隨使車化雨灑向天南隅立挾寒翳轉秋  
色桃李新植三千株賤子登高初請質賜我天孫錦盈匹奇氣  
落紙驚有神風雷似向天半出我讀再四開塵襟一紙直抵千

南金品題定自宗工筆想見雲霄愛士心書生敢說通政治一時大雅多深致驚賞翻孤國士知壯游豈了男兒事三十功名一卷詩湖海虛聲負初意我有私衷未敢陳感君垂顧情獨親如何金粟如來品持此飄零賣賦人別公斯誼忘不得卿雲暉高想顏色從此東坡誇向人當代歐公幸曾識

與查梅史明府夜話卽贈

星河低欲近闌干話到千秋燭影寒澈曉尙嫌三夜促論才不信九州寬縱橫懷抱憐同甫瑰麗文辭祖建安我有寶刀藏未出十年纔取就君看

寄懷陳叔安

百里關山一紙書文園病起興何如歸人前度疲風雪故國新愁入雁魚詩思每生潮長後春寒須慎雨來初江波不解離情

苦二月煙花媚索居

抵合肥贈劉海樹明府

九年風雨憶君勞

一夕星河放眼高人向詩天分錦繡我從漢

水問波濤

明府籍漢陽

花城白屋弦歌遍春酒紅燈劍氣豪壇坫江

南久寥寂相期斗畔聽靈璫

廬州懷古

萬疊龍舒冷薜蘿廬陽春色馬前過沙塵已覺中原近天日平

開曠野多三國功勲爭尺寸六朝風雨自干戈迄今重鎮皆閒

地但願巢湖水不波

遠霧都隨曉日昇晴湖鬱久看霞蒸地非天險關南北人上城

樓感廢興亭午山光猶黯淡平蕪雲氣自飛騰不須弔古論遭

際楚漢奇謀首范增

鵲尾吳師氣早揚藏舟鑿浦又星霜花枝紅照今殘壘草色青  
埋古戰場治亂英雄憑世運艱辛婦女耐耕桑可憐相國空文藻

謂龔天復

斷瓦頽垣

第宅荒

傳聞明遠讀書臺知傍西南水一隈故址無由尋蔓草有人異  
代負奇才琴樽寥落今游倦雲日蒼涼古恨來惆悵阿瞞空載  
妓酒船覆後笛音哀

廬江小吏泣紅妝化作珍禽繞樹旁千載鴛鴦開節義一篇孔  
雀擅文章貞魂有力成遺俗舊港無情冷夕陽別有傷心兒女  
淚非關人世感滄桑

便擬憑虛逐白鵬此心久共暮雲閑誰人願飲浮槎水我夢難  
拋大蜀山終古佛燈寒月下當年帝女謝人間墓門亦有花堪  
插好借遙峯作鬢鬢

行藏未卜野鷗知攬勝人當惜別時滿地春教雲水占一城愁  
讓客身支荒煙欲問忠宣宅落日孤尋孝肅祠賓主東南同擅  
美

謂薛

畫水太守劉海岱明府

陸祁生廣文許叔翹明經

德星曾否聚高陲

題程亦霞白秋海棠詩後

西風一曲斷腸詩引起新愁上故枝底事秋容太嬌怯月華滿  
地冷多時

美人愛着縞衣裳獨立墻陰怯早霜千萬莫教紅日照生來心  
性怕濃妝

置身曾悔託朱門半是愁痕半粉痕淡到無香秋亦瘦最關情  
處是黃昏

歸至舒城阻雨有懷

天外濤來洗路塵懸崖漲發斷行津不圖風雨仇歸客如此山

川貢古人絕技伯時淪白屋多才公瑾謝青春曠懷何限升沉  
感駐馬遲回獨立身

重抵合肥贈陸祁生廣文

聚散誰能料此行蘭陵別後又關城多才便占三生福病骨難

消萬古情

時祁生卧病經旬

天外雲山留舊夢閨中眷屬共詩名鄭虔

官冷君休嘆細雨簷花酒自傾

老馬和友人

歷遍人間險康衢亦太行雄心支歲月絕足飽風霜一顧恩猶  
在三邊願未償平生論駕馭低首只王良

早負空羣目雄名動九垓識途經瀚海弔古泣燕臺末路留神  
駿兒曹總下材蹉跎君莫笑曾上畫圖來

亦有騰空力風塵奈汝何已拚眠紫塞尙欲飲黃河背上春光

老胷前戰血多據鞍神自若猶足壯廉頗

校獵岐陽後風雲性老年深知驥德骨露見龍睛逸氣今深穩窮途共死生只因馳騁慣不敢愛橫行

寄友人山中

聞說龍舒卜結廬山名王姥舊靈墟

謂舒城王姥山

青鸞作使君知否

白鹿啣花迹在無露重濕雲封洞口年深春色老仙都芒鞋竹杖思相訪定有珊瑚百尺株

雲山

雲山萬疊入闌干故國愁連異地歡客思入春花怨別潮聲壓岸樹迎寒魚龍水暖豐鱗甲鴻鵠風高試羽翰腰下杜陵長劍在肯將生計問漁竿

柬祁生兼以問疾



相逢不長見，翻使寄書勤。一病難爲我，重來轉惜君。縱談虛盛會，咫尺等離羣。會掃浮槎霧，停樽話夕曛。

漫賦

徑欲滄洲曳釣竿，水雲深處棄儒冠。出門爭說長安樂，入世方知蜀道難。顧氏名園宜茂竹，屈平介性愛秋蘭。何當杯酒扁舟內，石色波光把卷看。

千仞高峯碧四圍，開軒人坐對朝暉。工吟轉覺難尋句，不嫁翻嫌早製衣。畫閣幾年求駿易，水仙一曲賞音稀。洞中舊雨如相訪，認取臨河白版扉。

壯游南北慣煙波，藏篋青瑤字不磨。久客已慙諸事晚，平生每恨識人多。胸中鬱怒千尋筆，底奔騰九曲河。聞說浮槎有新約，可能同聽采菱歌。

興黃小山同游有作

野草連城霸氣消客懷無奈雨瀟瀟花枝不語臨今日月色多情憶昨宵沽酒同過蝴蝶巷懷人獨上鳳凰橋幾多惜別難言意付與湖邊未落潮

寄送邑侯呂幼心先生之杭州司馬任

畫舫煙波一千里西湖聞信先驚喜龍眠山色卻含愁奪我使君誰爲留一喜一愁皆至性公之來去關民命我游公門已十載骨相離奇窮不改等身唯有詩卷在卻憶公初下車時甘棠手植天南垂公爲循吏無他奇如春感入人心脾山花怒紅水爭綠春風不言人自知好雨纔足甘露滋一語能留千日思公今奉

命人歌舞佐郡餘杭恤比戶循聲一日動

九重

勅作吳山風月主我思公身何太勞如理亂絲平驚濤天以湖  
山逸神志名與南北峯爭高公來已久未忍別官民相安忘歲  
月公行最遲轉覺驟攀轅不住情難訴陽和噓物本無私過後  
猶餘香滿路公與桐鄉緣何深桐人頌公直到今公不自覺有  
殊績縱江之水明公心我向廬陽探大蜀湖頭青見舟行迹未  
得送公渡江曲錢唐八月多靈潮魚龍戲與風悲號將以秋暮  
釣鰲去尋公海畔天蕭蕭

贈方丈柳村

凌雲詩思託關河醉菊圖成髯欲皤君有故山歸未得漢南秋  
水別愁多

題程赤霞詞卷

一曲屯田絕妙詞  
春風紅豆盡相思  
良宵忽夢秦淮月  
又是秋寒惜別時

酬方丈靜峯

家近江天第一樓  
梅花舊曲賴君留  
相逢漫憶仙人笛  
五月淮南樹已秋

酬韓奕山

新詞譜就倚闌干  
好月當筵酒未殘  
同向江東訪秋色  
青溪夜雨小姑寒

汪擎峯索題卷雲圖

片雲影共碧天開  
留傍晴空百尺臺  
知有爲霖多少意  
好風吹過楚江來

魏藹軒中丞開府吳中詩以寄之得五十韻

節鉞歸明德旗常表上游雲開新幕府地控古揚州

聖主知人早名臣報

國優氣涵滄海迴力挽大江流上將星芒定全吳掌握收崢嶸

看一柱

寵錫冠諸侯天日明精烟風雲助壯猷聲華榮再到公前曾任江蘇糧儲

事業總千秋鎮靜曹參酒清貧晏子裴辨奸同寶鼎削鋌得純

鈎陶侃忠勲著山公識量周斗南符重望吳下集羣謀武庫將

軍擅辭鋒學士適一身兼衆美早歲擅靈修筆走昆陽象文驅

卽墨牛窮經追馬鄭對策擬匡劉騁步雙龍關騰奇

五鳳樓碧霄占契台青史共綢繆已抱雲雷志差爲屈宋儔拜

恩初日下建纛久江頭敏捷旋風筆勤勞轉粟舟赤幢欣執法

紅籀又持籌粵海仁風扇謂開藩東粵吳山舊績留謂秉臬兩浙恩波隆

瞬息星象動奎婁節概

先皇重經綸幾輩侔

兩朝方倚賴獨步豈夷由入覲纔

三接殊榮已八駟江天持鎖鑰牙帳擁貔貅虎林邊竄蛟螭  
水底愁東南除疾苦遐邇起吟謳每嘆民風薄深嗟士習浮珠  
璣裁綺麗草木別薰蕕濟世心原切爲霖願已酬銘功惟

紫極吐論亦丹邱往者初游越論文荷拔尤西湖春蕩漾南國  
景雕鏤曾在高軒顧偏容隻句投奇珍呈薛燭當代見韓休一  
別羈雲翮三年倦客郵叢林號鸞鷟峻阪怯驂騑敢說虛名誤  
徒尋絕壑幽曲高彈亦厭袖短舞應羞不惜微軀困翻增舊雨  
憂並時逢稷契妄念比韓歐知已恩誠重高天路許求憐才矜  
杞梓樹節惜梧楸歲月消歌鋏風塵敝劍鞬舉天誰匠石斷岬

望瀛洲曉日生溫語

名已卜金甌

寄懷石甫

怪雨盲風苦夢思故人作吏久天涯全家渡海非吾意萬里騰  
聲動主知煙樹瘴消春曉日魚龍氣靜夜談時可能豪蕩還如  
昔銀燭高筵坐咏詩

海樹明府以

特旨擢授泗州詩以送之卽用其紀

恩原韻

懸圃瓊枝手獨攀循聲澈處動

天顏除官

命自雲霄下得句思從海嶠還此日恩波深泗水當年藻筆重  
燕關師生一樣蒙

殊數曆韻今推玉筍

以主事  
郎和其

生平雅望稱金華作令新看

錫命加楚國人才工頌橘河陽春色尙留花關情閭里同元結  
放跡雲天喜孟嘉從此酬知勤報績

君恩佇賜鳳團茶

詩人知遇由來少刺史

欽除曠古榮自有芳名驚太乙

謂藏書甚富

豈徒雅調補由庚隨車

雨露鄉村望前路風雲澤國生惆悵廬陽諸父老可憐溝洫志

初成

君方興廬陽水利功成遷去士民愛戀不置

洪湖浩蕩不知年曉色東來近馬鞭楊柳堤遮官道日桃花水  
浸漢時田哀鳴須恤離羣雁高潔原同飲露蟬料得淮南新政  
美銘功何必待燕然



自江浦渡江抵金陵

征途煙景付蒿萊立馬城南積霧開  
破曉秋光催暑散迎人山色過江來  
風雲龍虎千年氣花月文章六代才  
我爲頻經游興減秦淮水閣倦啣杯

廖鍾隱明府自宿松調任吾桐詩以奉寄

聞說飛鳧到故鄉龍眠有福得循良  
隔隣製錦能同樣遷地栽花轉覺香  
貫耳文名兼政績隨身雨露又風霜  
作書先替蒼生慶不爲交情十載長

萬疊雲山水一隈樅江風雨鬱龍雷  
已看神父承恩去

謂呂勿心明府

又見慈君握鏡來循吏如公原老輩

聖朝卽日用良才從今桑梓春如故  
卧雪袁安戶好開

孟塗後集卷二十

桐城劉開明東

年來秦小峴司寇吳山尊學士劉芙初編修相繼殂謝愴然賦此

天風吹斷伯牙琴雲水蒼涼惜此音海內文章知己淚酒邊燈火舊時心千秋事業空塵土一別交情隔古今但得名留霄壤內墓門何恨草痕深

奉和孫平叔中丞見贈之作

霄漢風雲啟正途鳳鳴百鳥息驚呼皖江布化金城重閩海迴瀾砥柱孤持節天教臨上國盪胸月已滿平湖九龍鍾秀原非偶大厦行看隻手扶

題王仙舸秋林讀書圖

疎林淺淡夕陽明四面煙痕護百城靜裏日閒紅樹老望中風  
定白雲生寸心相証惟秋色一卷蒼茫結古盟猶恐空齋嫌寂  
寞天教落葉和書聲

寄陳伯游叔安昆季

自別江天入楚雲瑤琴有曲更誰聞相思不覺春寒重手折梅  
花欲寄君

大觀亭小住阻雨卽事

側身霄漢此闌干收盡波光付翠巒風雨人孤三月興江天春  
釀一亭寒登高遠樹飛雲出弔古荒苔戰血乾尙喜老梅橫鐵  
幹香殘猶耐靜時看

上達樓前有  
老梅一株

九子浮空遠霧開天風吹浪激奔雷古今同送輕帆過吳楚都  
隨落照來岸近人煙歸畫艇地高春色壓層臺可憐秀水奇峯

句寥落青蓮曠代才

重新樓閣飾丹青

時方盛會消寒此再經去冬同丁仙坡先生

甫吳華南諸公

兩宴此各有詩風景有情供過客江山合勢抱孤亭滿牕翠濕

飛朝雨一水光搖浴夜星明日挂帆便東去春潮直下破風霆

謁余忠宣墓

突兀崇樓扼上游墓門直對大江流忠魂似挾濤聲壯片石能  
教日色秋百戰風雲今勝地全家血肉舊荒邱君看危老廬邊  
路廢塚纍纍野草愁

謁罷臺前露自清虛堂掩卷淚縱橫神風燈火搖祠壁夜氣魚  
龍逼郡城白骨地教芳草貴青山天爲此人生至今忠節池間  
水靜聽無波尙有聲

歸至三角潭口占

野橋流水不成春斷岸垂楊隔去津惟有多情渡頭月安排良  
夜送歸人

奉題陶雲汀方伯漕河禱冰圖

魚龍寒壓勢不起凍合滄波三百里忽然一夜冰山開精誠到  
處天能回萬艘直上聲如雷公之禱冰何神哉公言此非關人  
致暫開復合乃神意天以利運彰公奇偶爾破格爲此事我思  
公力能透冰陽和所被消陰凝手持漕節轉春色積寒如鐵留  
不得又思公節同冰清冰夷心亦傾公名焚香告天禱已久卽  
此一節知平生况今河海皆效靈貞妃默護邀

恩榮

謂露筋貞女以禱河有應  
勅加昭靈慈惠貞應之號

公之忠勤神感召澤腹不敢持

堅貞遂令川路出頃刻漕河萬斛舟行輕昌黎禱山公禱水雲  
開冰解同一理後先佳話各千秋此圖卽可爲詩史

抵陽羨齊梅麓刺史邀游武林舟中出句見贈賦此和之  
別思三年積奇情一葉俱破雲向東海謂將游乍浦攜句問西湖煙  
景春留越江風夜別吳同來明鏡裏鶴影不曾孤

煙雨樓口占

湖光樹影入迷濛四面陰濃翠接空縱是晴和風日好樓臺長  
似雨煙中

重游乍浦和梅麓刺史觀海詩

岸雲盡處出飛巒重向滄溟把釣竿石過潮聲當外轉天沉水  
氣入東寒白旗忽近番船速紅日難周海界寬尙有伯牙臺址  
在千秋此曲更誰彈

南游同泛米家船各有奇懷向八埏一浦地兼湖海氣半空水  
濕越吳煙龍宮蕩漾波間日倭國微茫島外天盡捲風雲入詩

去挂帆朗月已前川

抵武林贈竹嶼通守

久別胡爲復此行  
天風吹夢度關城  
故人驚慰重來意  
曉日蒼涼獨立情  
窮達交從歧路見  
江山奇共口懷爭  
逃名自愧非康伯  
且喜龔黃績已成

西湖寓樓與梅麓刺史小住

收得全湖勢  
高樓傍水邊  
人來空際住  
天入鏡中圓  
浪影連雲動  
山嵐著雨鮮  
偶然思得句  
圖畫列牕前

湖上看雨

煙外疎鐘帶曉聽  
樹籠薄靄畫冥冥  
雲來頓覺全湖黑  
天遠微留一角青  
樓下雨催停短棹  
望中波暗失孤亭  
米家山色須臾現  
墨染峯巒作畫屏

軒牕對雨勝晴暉萬點珠拋碧四圍  
灑入湖光驚破碎倒隨風力竟橫飛  
蘇隄遲興誰青笠葛嶺迎晴想翠微  
變境無端今見晚三年枉自濕征衣

偕梅麓刺史游定惠寺

即虎跑

風光齊集寺門前夾道長松翠總連  
細草深時香滿徑濃陰合處樹爲天  
高僧舊闢雲中舍神虎能開地底泉  
借得匏樽風味永安心何必遜坡仙

觀虎跑泉

泉舊爲虎跑出必有異狀今周圍以石砌環之上爲石闌干不復見噴薄之勢因感而賦此

已作階前水

東坡有道人謂聞出地音腥原無虎氣清可鑑

人心一勺茶香發千秋石影沉未知源起處何似舊時深



過開化寺登六和塔絕頂

盤空七級出浮圖絕頂憑欄盡越吳三折江聲趨巨海一峯山  
色障西湖俯臨城郭身如寄直上雲霄興不孤咫尺錢塘潮信  
近月泉飲罷立高衢

游雲栖寺

四圍深鎖認禪關一線中開隔世寬穿徑日光難透地到天竹  
色欲無山行來石澗人都靜洗盡塵心水亦閒謂洗心池安得誅茅  
傍峯頂攜樽長坐碧雲間

蓮池大師塔院

青年學佛能拋俗白髮談禪喜著書修到蓮花還並蒂重泉大

婦對山居

大師妻湯氏慕塔卽在山右與此山相對公出家後夫人亦祝髮成道謂之孝義菴主

白雲栖登五雲山頂卽呈梅麓刺史

破曉征衣露氣侵側身低望亦千尋高巒樹密非吾意故國江

流入客心

錢塘江發源徽州梅麓刺史見之有鄉國之思

海氣遙浮紅日至天光低透

綠雲深可憐荒草前朝寺梵宇徒聞鼓吹音

時真際寺有演梨園者

### 過九溪十八澗

萬綠深無際飛來各道泉流時忽明暗淺處亦盤旋澗狹無多逕溪回總一川靈源尋不得上有老龍眠

### 自茭蘆菴入深潭口窮西溪所至

三十六灣流水長西溪都在綠雲鄉徑同忽覺遙峯至春去猶聞野草香兩岸樹交舟下走一湖煙淡日昏黃畫圖面面窮難盡久坐能教歲月忘

### 漱玉軒聽雨

一枕夢初穩雲山笑客勞深宵忽風雨曲沼亦波濤語爲連牀

切詩因得酒豪故人同話別何用讀離騷

題竹嶼夕陽春影圖

青天碧海恨難窮花影分明咫尺中賦罷曉雲人不見東風無語夕陽紅

重思往事總如煙草草人間只廿年香夢一絲春影斷落紅無那別離天

星前小劫不成春鏡裏明妝已隔塵想見亭亭殘照外桃花瘦處是前身

登吳山

煙巒中聳壓江湖東去遙天盡海隅隔水萬峯齊抱越界空一道已窮吳崇樓直挾明霞起飛塔疑將落日扶三上大觀臺畔望波光沒處接平蕪

夜歸湖上

暮色自山下行人猶翠微老僧攜杖立落日送樵歸月出聞魚躍湖寬見鳥稀所欣游已罄幽意不相違

樓中醉題卽用留別西湖

朝泛湖上舟暮宿湖邊樓湖光如此不痛游青山笑人空白頭陽羨刺史才無比與余探奇同到此手把芙蓉入鏡中四圍山束一湖水我別西湖纔四年淡妝淺黛還如前相逢一笑露真面天風掃去湖中煙舊題如夢留鴻迹湖畔好山詩可掬湖水色淨玻璃沉微風蕩漾成皺綠我住高樓臨水邊日與雲氣相周旋有時夜月無心至波光扶月蕩空際照見衆魚出游戲有時破曉飛翠來我欲迎以青玉杯舉杯醺酒潑山色畫屏新向牕前開西湖勾留已十日風光五路齊搜出金碧潏零圖畫殘

湖山真處猶全筆樓頭覓句無晨昏寸懷已覺全湖吞香山玉  
局不可作眼前此意難具論人生快意須及早莫待飛花變爲  
草游客重來感舊多西子年年不曾老歸舟欲發仍躊躇良時  
難別惟此湖五柳樓前一快飲猶與煙靄同歡娛卷中好景無  
遺缺忽忽留詩與湖別湖波頓起聲如咽白雲在天看此行夕  
陽相送無限情

戊寅初夏余游西湖見孤山竟無梅樹爲詩慨嘆今再過  
孤山則梅花已數十株蓋近年所植也口占志喜

孤山新喜植梅花客到憑欄看日斜樹有寒香亭有鶴誰云處  
士不成家

哭龔西原太守

幽燕落日淡征塵

君歿于保定

南國西風淚濕巾天地何心孤舊類

士林無福喪斯人千秋章水論交地五馬匡山攬勝身良會未  
遙成永訣重泉何處更尋津

皖城口占

白雲無恙水漫漫話別高亭酒欲闌底事杏花消息隔江城二  
月尙奇寒

陳叔安得文衡山畫卷卽以爲皖上修禊圖索同人題咏  
余因作歌

江天如畫開三吳波光盡處連平蕪白雲在天入杯影去春同  
集城西隅別來風景不可得君乃私貯留自娛相逢出示忽大  
笑水雪半幅驚糝糊異哉古人真解事先爲吾輩成此圖吾輩  
小憩亦陳迹攬勝窮歡肯餘力痛飲狂歌不自禁那識風雲爲  
變色青山作態臨斜陽江亭日暮猶傳觴興來意氣挾山動圖

中人亦神飛揚語君勿輕覓同調爾我各有千秋抱勝會今昔  
自一時其人相類安得知

孟塗後集卷二十一

桐城劉 開明東

渡巢湖

片帆直下楚雲端人過居巢酒未闌  
萬頃湖光吞岸白四圍山色抱空寒  
舟中日月尋誰共江北風煙到此寬  
爲訪故人輕遠涉

謂張少府

西來忘卻路千盤

抵柘皋偕張少白入山卽用前韵

看山奇興發無端曉入松園雨正闌  
水氣能移初日色春陰猶積舊冬寒  
浮槎近向林邊出冶父遙臨鏡面寬  
安得深談同待月波心夜半湧冰盤

十萬松園歌爲少伯山人作

少伯山人今米顛不坐米家書畫船  
青山深處結一廬以松爲



產山爲田種松滿山不知數根在白雲枝拂天山人非隱亦非  
仙一官小住巢湖邊買松之外無餘錢時時與松相對眠我久  
別君詩境變松園之奇惜未見山中既有歲寒交肯使故人無  
一面今春我來自江潯山松快我能登臨短枝各挾千尋勢陽  
春亦抱三冬心我觀松枝何秀發托身喜在仙靈窟偃蹇無心  
作大夫主人與松同傲骨此松負山復臨川高低合勢如齊肩  
就中年歲誰後先人行松中不自覺湖光山翠浮松巔以手弄  
松松不語大松小松欲飛舞忽然平地風怒號松間如聽千頃  
濤一松貌古遙相就似爲羣松作領袖諸松羅列向人前安得  
人盡如松壽閒雲白來鳥不驚主人爲松養高名名山生面藏  
不得松爲主人開顏色主人得松意氣雄三十萬株皆蒼龍一  
一吞吐雷與風青山幾曲雲幾重溪口皆松雲不封我欲移宅

來相從飽飲松醪食松子山人可以稱富矣竹杖芒鞋萬松裏  
駐景延年從此始

題李鳧村明府桐陰聽琴圖

梧桐露濕青疑洗碧雲到地涼如水中有人絕世姿獨抱秋  
心彈綠綺綠綺纔橫調最清湘簾不捲聽分明畫堂喜奏青鸞  
曲要學丹山第一聲旁有胎禽似延佇對立亭亭尙無語彈到  
深宵萬籟空人自忘言鶴思舞鳧村明府素愛琴生平能識弦  
外音一撇一柱皆秋思陡覺情同湘水深濃綠滿階風欲掃石  
色侵衣覺寒早獨坐空庭意氣平餘響遲回聽未了風前領暑  
更寫真從此圖中有解人

癸未夏秋東南各路漲落洪水與潮水合勢浸溢被災之  
地蔓延數省桐城亦當其衝卽事書感得十二律

竟教平地變長川萬派驚濤起自天江濶有沙填柳岸潮高無處認桑田幾多白骨拋難覓百萬蒼生命尙懸莫爲時艱嘆奇厄古來洪水記堯年

一夕喧傳水決聲可憐人與屋同傾片時已分無全策萬口猶聞喚救生徑棄故園悲莫惜幸留殘喘痛還驚天涯縱免饑寒苦存歿難爲骨肉情

下連吳越上江關萬里雲煙浩蕩間并合湖池真似海平吞蒼翠欲浮山林花無主空溪寂墟里稀人竟日間最是饑鳥飛道路離鄉安敢卜生還

相逢未肯訴同儔千里流離豈自由托命荆榛徒飲恨傷心婦女尙含羞誰能泣血陳

雙闕不信洪流半九州可惜江南禾黍地早秋天氣使人愁

心盡艱辛路幾盤事從追憶更心酸休嗟九月風初冷尙恐三  
冬夢未安籌水比教籌旱急救饑猶易救寒難挽回造化生春  
色只在忠勤冢宰官

議賑敦捐事總宜輿情憂喜寸心知真思撫恤何無策能起瘡  
痍早趁時秋色無情空望遠

君恩有例敢嫌遲持籌大府關懷切肯使哀猿困不支

迢遞龍舒接皖陽往來爭聽說籌荒連艘糴資全楚百里東

南痛故鄉桐城水災東南鄉尤甚人鬼分途爭瞬息死生無故問穹蒼田

園漂泊房廬盡堤柳何心繫日長

江淮一望舊桑麻半化滄波半是沙悵望路長唯有淚可堪水

退尙無家山容帶雨愁難展野哭連村慘不譁堪歎耕牛亦遭

劫零離刺血飽飛鴉

絡繹軒車各路馳沿途誰問乞聲悲救災法在書難用施粥場  
多衆尙饑小坐草間夫慰婦倉皇道右母呼兒關城一片荒寒  
色死別生離集此時

故人家半徙高岑雲氣蒼涼日影沉近水爭看蛇上屋俯江翻  
訝鳥辭林漲來豈盡山靈意潮長難窺海若心多少炊煙波洗  
淨天邊獨客漫哀吟

川路遲回怯遠征頽垣敗瓦認縱橫全家半葬江魚腹滿地愁  
聽澤雁聲疊石壩頭隨水去隔江樹杪見船行遙天亦有青山  
色多恐傷情看未明

振策三吳興已孤眼前有景只青蕪忍教花柳繁華地都作蛟  
龍出沒區半夜波搖風助虐三秋萍散爾何辜書生竊嘆終何  
益坐負昂藏七尺軀

渡木樨河至金山古寺

木樨河水響潺潺終日穿行翠靄間古寺雲深人不見門前紅樹認秋山

十月三日山中卽事書感

愿遍關河二十春那堪壯歲尙風塵秋光濃淡歸佳日天意微茫看此身入世幾曾容嘯傲清時未敢怨沉淪龍眠咫尺拋難遠仍是家鄉作客人

披榛獨踏萬峯來石色泉聲路往回四面煙嵐留我住半生懷抱向誰開已經河海難爲水未遇風雲不算才手折黃花聊自

慰酒酣遙指鳳凰臺

麻山地名

黃河東上海雲端今昔遨遊眼界寬十載功勳全卷在一宵風雨四山寒隔牀燈影搖難滅撼枕松濤聽未安堪笑盧生心太

熱倦來容易夢邯鄲

投筆題橋願總奢故人相望各天涯青山紫石君開社白日滄江客憶家俠士未逢求寶劍傾城難遇種名花良辰可惜愁中過坐對霜天感歲華

讀罷凭欄欲問天幾年高岸變深淵千尋杞梓人誰並十月芙蓉我自憐名士晚成關氣數英雄退步卽神仙歸來擬闕羅含宅萬疊紅霞遶屋邊

過蜈蚣堰

界河北望客徘徊十七年前住水隈無限舊懷與秋色暮鴉親送片雲來

桃花岡口占

桃花岡上夕陽紅人影忽忽別路中坐對青山無共語酒愁半

日壓東風

客夜對月

連岡抱郭聳煙巒  
旅館風輕露未闌  
如此良宵人獨坐  
可憐舊歲月同看  
離鄉兒女詩懷切  
落葉關山雁路寒  
領取燈前一樽酒  
客中誰爲勸加餐

豔情

鸞鳳盤釵股芙蓉壓髻心  
妝成宜近月曲罷尙橫琴  
自喜當階坐那知涼露深  
紅芳誰見惜空九華衾

自舒城抵六州有懷

今秋我自皖陽回  
日日天風向客催  
一路白雲穿石過  
萬山紅樹訝春來  
迢迢蓼六寒煙接  
經過龍舒暝色開  
身到九江故都地

英布王九感時應憶出羣才



淒涼祠宇問城東  
邁種庭堅祀未崇  
才子古來唯帝佐  
黔徒時至卽英雄  
風雲炎漢功誰惜  
日月中天運尙同  
明德千秋亦寥落  
詞人何事怨途窮

浮槎遠隔浪雲邊  
憶昨湖心泛釣船

今春訪張少伯過巢湖

竹杖已招松

徑月

謂遊十萬松園

金庭未飲杏花泉

約探金庭山洞不果

身非巢父長思隱心

妬王喬早得仙  
今日霍山相對近  
天池古樹沒蒼煙

商航千里集河濱  
絡繹來颿又去輪  
四季歲華歸物產  
一州生

計趁茶春青山無地容芳草  
紅粉爲傭逐路塵  
採得雨前新雀

舌滿城同慶豔陽辰

勝地重經莫醉歌  
人間萬事總蹉跎  
異書得自山中少  
好句來從枕上多  
客館夢殘淹歲月  
江淮水接尙煙波  
繁華境內誇風物  
翻使空岩冷薜蘿

沙塵滿眼少親知，舊歷樓臺認轉疑。  
江北風煙城市占，冬初天氣客途宜。  
名區日暖春留易，大野雲空鳥去遲。  
徑向潁川攬形勝，菊香看到晚寒時。

徐荔菴徵士索題詩卷口占二十八字

輕寒正與菊花宜，高閣攜來一卷詩。  
珍重客愁難遣處，小西湖畔獨吟詩。

東 祁生學博去秋以詩見寄，久未作答。今依韻酬之，卽以代

士衡。儒雅最多才，一紙詩將別恨來。  
並世論交忘我拙，經春作客送秋回。  
江淮價賤文通筆，風雨人思鮑照臺。  
咫尺舊遊愁不見，關河更聽雁聲哀。

潁州懷古

匹馬關河極望頻，汝陰風日又昏晨。  
西來雲氣連嵩嶽，東去淮流走壽春。  
民俗到今宜武事，郡城自古聚文人。  
請看高會歐蘇宴，千里逢迎自水濱。

一匡霸業久消磨，潁上雄圖委逝波。  
貧賤有人知管仲，蹉跎無意弔甘羅。  
風雲遇合髫年少，口舌功勲戰國多。  
往事迷茫難具說，城頭飛鳥下長河。

金雞樓上口初生，照見沿河遠樹明。  
風景已非胡子國，野煙誰是宋公城。  
舟車水陸交形勝，治亂人才起戰爭。  
沙土接天皆要地，兵戎靜後聽波聲。

山桑境與壩城同，莊老生當百里中。  
一夢迷離工化蝶，千年品藻始猶龍。  
流星迹古祥雲護，秋水文成此筆空。  
仙派淵源推勝地，幾時羣起太清宮。

近郊地亦有西湖碧水成田蔓草蕪煙水曾爲名宦宅山川直

接舊王都

謂湯都

秋風禾黍無今古野色牛羊入畫圖雙柳亭

空人不見白龍橋上看飛鳧

宛溪河梁氣吐吞淮西重鎮此藩垣水光不與青山合風力能

教白日昏晦叔去時加豸服歐公佳處卽龍門飄零吳代無文

物誰問廬陵舊子孫

輦鼓聲高昔振隄順昌旗幟壓雲低捷書飛度長江上戰氣橫

吞落日西北走君臣同魄散南朝將相肯心齊時平故壘難尋

覓曠野風寒鳥亂啼

地過江南未有情渡淮風物別愁生佳名枉說高唐近絕代誰

令下蔡傾璧月幾宵輪舊夢潁河百折下孤城防身長劍懸官

閣莫爲升沉氣不平

題荔菴所藏先世遺硯

諫草幾同就臣心一硯留筆耕長帶露石古不知秋點水皆先  
澤微田足歲收珍藏有光彩半夜紫雲浮

偕王春颿出城卽贈

潁川十月正連晴攜得新知出郡城地盡平沙無草色天留落  
葉續秋聲憑高各負凌霄志望遠同深去國情一蹴青雲君努  
力朝宗江漢勢誰爭

懷李申耆太史

吾道今寥落名山有此人文章懸白日纓冕謝青春粵海看雲  
久揚州醉月頻蒼松留古色育卉已爭新

登潁州城樓

壯懷不盡更登樓浩蕩平原此處收衆水合流成重鎮一城三

面接中州黃花已過江南節白雁仍傳塞北秋獨惜奇功劉大尉荒祠零落未重修

迎祥觀有銀杏一株相傳前明張三丰徙倚其下此樹死而復生蒼古鬱特蓋數百年物也因作一絕志之

一株搖落殿門前古幹龍鱗閱歲年說是神人遺跡在滄桑舊事付雲煙

將游亳州留別海樹太守

新承

天語出明光剖竹淮西重保障汝水雙流歸潁郡宣城千里訪歐陽秋風破賊論功業藻筆同春補宋唐此去龍眠逢雪夜題詩還憶聚星堂

海樹太守以五言二律見贈依韻酬之

破浪下遙汀帆收岸草青片雲分路出

今春在皖與太守歸雁同舟至於湖分路

隔江聽霽色浮林葉春風暖酒瓶別來驚歲晚

霧又空冥

匹馬渡長淮秋聲聚客齋風雲尋舊雨天地共詩懷斜日楊枝瘦初寒菊色佳辭君歸欲隱杜老有青鞋

阜陽道中偶占

野色蕭條潁水西經過白廟又河隄黃塵風起移人迹清曉霜寒刺馬蹄天遠不知雲去速地平翻訝鳥飛低細陽北望無多路斜日荒原樹影齊

抵太和留別阮侯庭明府

順昌傾蓋共高筵阮籍聲華冠七賢射策文詞傳紫禁栽花仙吏正青年憐君政比三冬日愧我才非萬斛泉剪燭細陽兼惜別寒鴉無數噪前川

偶向

川原北望入雲深  
倦鳥何時向故林  
雪意未成寒尚淺  
風聲初定日還陰  
半生卷裏名山句  
一夜燈前四海心  
故舊天涯各寥濶  
新知相對祇高吟

謂楊卓齋少尹

言懷贈阮雨人

思歸無字報平安  
寄信非關道路難  
千里雄心唯健飯  
全家生計問征鞍  
逢君異地多文彩  
把酒高軒話夜寒  
轉瞬煙霄騰絕足  
琴書且耐客中歡

自太和入毫

一望天無極  
前邨樹幾層  
倪邱猶曉日  
淝水已堅冰  
暖意同杯酒  
寒宵淡客燈  
單車南亳近  
將欲問陽陵

曉起口號



朔風暮起霧漫漫酒力消時夜已闌殘月在天人攬轡馬頭耐  
得五更寒

亳城懷古

睢陽北望總沙塵咫尺梁王迹已陳渦曲園林天亦雪乾谿雲  
物楚餘春戎車中夏爭雄志野塊君王獨卧身一死相從唯二  
女細腰空瘦舊宮人

龍鳳溝開水變更白零湖畔路縱橫伐燕枉駐桓溫馬破賊曾  
勞祖逖兵南國籌謀廬建業中原恢復始樵成渡江擊楫悲風  
至部曲同增慷慨情

蓬坡遺址剩苔斑攬勝天寒鳥自閒鹿邑西來猶是水雉河東  
走尙無山希夷里宅猜疑內炎帝衣冠杳渺間聞說咸平琳宇  
盛謂咸平寺雪中指點到禪關

天書下降自真宗憶昔鑾輿向亭中輦路橫連煙水白羽旗飛  
捲夕陽紅玄元謁罷春長住俎豆興衰運不同只有朝真門上  
月殷勤猶照太清宮

牡丹時節鬪繁華十畝香風送客車不分洛陽稱國色最難江  
北有名花我來未植三春景地好能栽萬朶霞舊日支園擅佳  
種天香今竟屬誰家

謁老子祠

彫殘碧瓦氣高寒誰向琳宮築淨壇終古白雲纏故里至今紫  
氣尙長安人間寥落空祠宇柱下棲遲舊史官辛苦五千元妙  
字羽徒更覓解人難

紫府丹霄任所之青牛當日亦逢時人生苦縣仙成易世有春  
臺我上遲道大嫌爲帝祖情多猶記送先師元都宗旨南華

備豈獨關門令尹知

鴻荒舊事付雲煙急雨飄風閱歲年天上三清名最貴域中四大道應先治傳黃老開文帝傳並申韓誤史遷仙李蟠根靈迹在祥氛彷彿廟門前

寄張四召亭

自別龍眠入亳城牛羊衰草動鄉情故人不見青山遠拋盡江南是此行

湯陵有懷

中原猶是舊邦畿千里人煙事已非今日白狼無處覓當年元鳥竟誰飛荒郊零雨寒松柏片土西山剩蕨薇可惜墨胎賢世子忠魂曾否認東歸

陵寢淒涼碧草蕪我來憑弔獨欷歔千秋玉馬悲元子九有河

山怨獨夫寥落餘民周下邑消沉霸業宋遺墟可知尼父猶殷  
裔如此家風曠古無

赫濯聲靈自九垓武丁繼起展雲雷君王不語非無故天帝關  
心乃薦才版築功名因夢得鹽梅輔相自圖來中興事業神孫  
擅莘野風雲亦草萊

故土曾傳大邑商莊山鑄幣亦倉皇天災七載人無恙河患頻  
年史未詳不信圯流多豫壤尙欣水勢減陶唐盤庚作誥權宜  
策蕩析流民事可傷

魏武帝故宅

譙東精舍沒蒼苔射獵冬春亦壯哉亂世紛紜誰識主奸雄猜  
忌尙憐才成功天限三分局饗土風生八角臺知己舊推喬太  
尉墓門祭罷淚猶哀

卽事

探奇窮北郭名勝舊無雙  
渴馬寒餐雪饑鳥曉啄牕  
殘冬珍短景歸思渡長江  
正欲循渦水前途問畫艫

贈任霽峯太守卽用留別

甘棠舊種皖江濱  
五馬

恩榮荷

紫宸苦縣能教成樂國  
寒冬到此變陽春  
文章今昔歸淵府

時議

修州志風雅渦淝屬主人  
十日平原叨宴飲  
梅花相約在前津

薛家閣遠眺有懷姚幼樞明府

軒牕極目楚雲邊  
高閣名從舊日傳  
夕照殘時林有雪  
平原盡處地連天  
眼中物望人千里  
江上詩懷別五年  
聞道王喬新政美  
幾多春色滿漳川

酬硯香見贈之作

生平踪跡窮寰中。名山閱遍徒自雄。十年結交得明月。一日痛飲來春風。羨君吐氣真如虹。昂昂天骨騰霜驄。乍見不知卽舊識。文章契合神感通。示我一編字。鬱律染雲剪。水同春工。又如海心拾紫藻。靈犀逼浪寒蛟宮。樽前自云不善飲。談深轉覺杯易空。酒酣慷慨論人物。就我索取龍門桐。蒼龍隱約鶴翔舞。此曲分奏音自同。怪我匣中何能熊。其光燭地橫高穹。明珠藏久珊瑚折。寶氣欲出蒼煙籠。瑤草千本花百叢。掩映空綠搖飛紅。筆端春色爛如許。挽回造化偏無功。感君愛我情日厚。片言遂訂交。始終舉世皆宗鸞。與鳳君獨胡爲憐。孤鴻吁嗟乎。孤鴻飛處天杳濛。浮雲自北江水東。

得倪蓮舫書卻寄

舊雨書來自白門去秋燈火話餘溫九年鄉國春風隔君未歸里者九  
年一別雲山此卷存客邸生涯唯白酒歲寒天地易黃昏淮西  
咫尺睢陽近無復梁園雪夜樽

歸至霍邱道中偶占

桃花店口霜猶白棗樹墩前日未紅破曉連程催早發歸心不  
畏五更風

孟塗後集卷二十二

桐城劉開明東

喜馬元伯水部回里卽題其塞上草

一曲秋笳恨百端詩吟大漠氣高寒風從黑水平時靜天到黃  
沙盡處寬萬里去來資幕府謂松靜孤雲東北望長安請看墨  
灑窮荒地滿紙龍蛇勢鬱盤

金雞纔放自關門塞上陳情叩

九關藻筆有花開絕域錦囊得句亦

君恩聲盤雪海詞何壯春轉冰天露正溫今日龍眠歸幸早好  
風催進故園樽

輓劉海樹太守

休文卧病久經旬事到難聞信竟真江左循聲猶白日漢南芳



草謝青春

九重特簡原殊數多士同時惜此人  
宦迹忽忽纔十載可憐堂上有慈親

玉筍班中此列仙一官江表鳳高鶩  
新符竹使淮河北舊愛棠陰泗水邊  
戎馬班生能破賊文章李賀恨無年  
小西湖畔休回首草色萋萋十里煙

去年同集皖公城暮雪江天正放晴  
小艇綠波聯舊句謂同舟至蕪湖  
華堂紅燭破離情遷除太早官翻累  
生死無端我不平尙有晏公雙柳在  
夕陽流水響淒清

詩卷流傳遍九垓收將此筆付風雷  
蒼茫身後無窮恨跌宕人閒未易才  
一別誰知塵世隔重泉定有夢魂來  
遺孤弱弟愁多少幸賴歐公作主裁

謂牛西園太守

咏綠牡丹

尋芳疑到翠微宮，說是繁華景不同。如此名花比傾國，題詩合用碧紗籠。

嬌姿欲語總無端，淺碧煙浮護曉寒。富貴生來無別樣，任君花葉一般看。

到是開遲轉占春，枝頭色奪柳條新。姚黃魏紫皆同輩，莫認青衣隊裏人。

休誇天上碧桃花，品貴端推鄭國家。本是沉香亭畔種，任他草色妒天涯。

腮紗半面襯花鮮，得遇青蓮亦有緣。看到天香新吐後，汝南碧玉正芳年。

青瑤作色露爲香，擬向花神奏綠章。可是朝來酣酒慣，鬢雲綠

繞未濃妝

相逢恍惚向瑤臺花亦垂青似愛才國色人閒如有價綠珠一斛買春來

亳州觀牡丹歌

任研香公子邀同陳晚香宋一韓金瑟儀戴小麓諸君由孟園何園至李園遍觀牡丹卽席賦此

牡丹時節風先催春寒壓我黃金杯花神鄭重故修飾欲吐未吐心遲回作詩連日陳花臺忽然萬朶雲霞來小黃主人惜芳質隔年早訂看花日今晨興至破愁出春事已到十之七去花半里先聞芳花氣如絲透出牆人來百步花似豔側身低面迎路旁滿懷春思不暇訴眼一見驚欲狂飽餐秀色沾濃香乍到已使春風忙羣芳胡爲齊嚴妝天然淺碧裁衣裳猩紅一點

都難藏花雖不語人斷腸曉來嬌不勝酒力露氣襲人人故立  
漫言四海求傾城到此翻教迷五色一層紫霧一層霞幾團粉  
雪如楊花中有絳綃人獨處綠雲隱隱臨牕紗渦曲繁華此第  
一紅玉爲田香作室貴超百卉偏多情豔到十分嬌有骨人閒  
何物比風流太真容貌謫仙筆我今賞花須盡歡枝上齊張瑪  
瑙盤酒酣花亦覺無賴可憐欲倚無闌干迴姿送影愁百端暖  
香熱豔支春寒對儂欲前忽又背含情思解雕玉珮偶然作態  
思紛紛人前揭起幘金裙東風搖蕩不自主繡屏無故飛朝雲  
此時人心趁花意痛飲譙陽成盛事三千粉黛會名園十萬  
脂散平地種開香國春正長出地便成雲錦章如此方可居花  
王花宮仙子皆同行并肩一色無低昂使我四顧生輝光天香  
有種何處得我欲移植求東皇急喚花奴命花史睡倒花前莫

扶起千里來遊原爲此色地香天人醉矣富貴從來誇絕倫誰  
識芳心冷耐貧不是早時甘寂寞安能豔成高陽春勝地相逢  
一樽酒名花國士遇非偶揮毫願借生春手容華思共洛陽爭  
絕代千秋有定評請看今日留題後江北中原誰盛名

案頭對牡丹得句

慚愧他鄉落拓身天香供養慰風塵花如開早翻難豔人到能  
癡始算真絕代誰邀千載遇濃妝已足十分春蕭齋靜對忘寥  
寂滿紙瓊瑤豈是貧

硯香索題瓶中牡丹詩以贈之

公子愛花等傾國不教拋擲春風側昨來攜置銀瓶中珍惜人  
閒好顏色此花來自有情天喜傍多才人少年江南狂客亦奇  
絕作句日日呈花前花光掩映宜銀燭綠認衣裳紅露肉已能

宛轉任矜憐未免嬌慙覺拘束書聲初罷風微和波紋簾外無人過案頭彼美何太多一寸春心奈汝何

牡丹後歌

任齋峯太守約同曾亦如司馬陳晚香金瑟儀諸君并率硯香昆季齊集城西十八里之李氏園觀牡丹儼若主人設宴竟日卽席賦贈

出郭尋春二十里看遍新綠到紅紫牡丹酣酒未曾醒一時客至忽驚起東風有意助春工吹得名花豔如此我昨痛飲城東邊名園游遍春可憐花枝亦解鬪顏色要與詩句爭鮮妍今日侵晨來勝地東君一一先位置好花留待使君至使君惜花如惜人一枝一葉皆陽春使君愛花如愛土不比尋常桃與李護取人間第一香名超百卉冠花史微雨初晴天正和看花一刻

休空過徑叩花園  
謁花主壁上彩雲欲飛舞  
芳心對我願全吐  
人到有情花似語  
主人雅性宜林泉  
富貴能與花爲緣  
琉璃布地香到天  
四面紅霞鋪作錦  
千羣紫玉種成田  
嬌姿絕色誰先後  
太濃轉費春消受  
藕絲衫子元玉裳  
謂藕色墨色兩種乃他國所無者  
服飾不麗生奇光  
中有一朶面徑尺  
領袖羣花稱貴客  
意態端嚴自矜惜  
不肯塗脂作芳澤  
阿嬌矜貴飛燕輕  
漢宮春色描難成家姊妹各如玉  
宮樣新妝盛結束  
五家豔隊一齊出  
紛披珠翠爛雲日  
一日之內變態新  
花房乍啓春橫陳  
此花本不耐斜照  
全憑曉露爲精神  
好鳥聲聲催進酒  
風來花亦爲低首  
人影與花相左右  
主人宴客情何厚  
繁華滿眼春在手  
此會此花同不朽  
遙天欲暮煙靄生  
惜別花前無限情

不見

不見家書至唯聞塞雁歸悲歡難信夢冷暖幾更衣燈下人將別

謂金瑟儀

天涯願各違客身無限事未敢報庭幃

夜坐無聊以酒奠牡丹有感

夜靜無端雜感來惜花更奠紫霞杯妝如飛燕猶非色生後青蓮不是才  
倚相憐思共語繁華太盛怕全開傾城名士原難遇珍重芳心自主裁

何刺史招飲花下得句

連朝痛飲醉花前滿眼繁華又客筵三徑竟成金粉地一時同到綺羅天生來貴品逢時易護惜名香識主賢不是酒闌歸意嬾幾番流戀夕陽邊

得姚石甫書詩以報之

聞越驚傳一紙書別來消息正愁予幾年夢隔鯨波外兩地春



交雁信初卧棘南天誰共語時方丁艱種花瘴海舊何如元戎奏  
記吾曹事鄭重風煙愼起居

咏芍藥

牡丹零落信銷沉染翰重爲芍藥吟一樣新妝同國色初逢嬌  
客訴詩心春歸轉覺繁華勝花好無如別思深惱恨將離名最  
早累人持贈到而今

鼠姑自昔重西京出格風流合屬卿對景豔驚韓吏部當階紅  
認謝宣城飽含濃露猶無語乍脫宮衣亦有情銀燭齊燒看未  
畢爲花宛轉坐深更

絕好容華極盛年宴游休說廣陵筵名花不借陽春重色界真  
開大夏先金帶當時占宰相玉盤此日獻諸天作和亦有調羹  
用肯讓鹽梅獨擅前

冶豔難禁此數枝琉璃葉上未題辭  
殿春莫問容肥瘦作后何  
論嫁早遲香品曾登騷客賦芳名  
却誤鄭風詩燕陽自古英雄  
地絕色如何盛一時

依然錦繡護雲煙多少餘春慰杜鵑  
富貴送完前度客清和留  
住有情天嬌能耐久纔堪重折到歸來  
轉覺鮮豈是開遲心愛  
懶由來絕代自矜憐

偕陳丈晚香任硯香至城東觀芍藥復作長歌

小黃城外芍藥花十里五里生朝霞  
花前花後皆八家家種  
花如桑麻紅紫爲田綠爲圃一痕草色低難遮  
龍眠詞客游江北一見芍藥如舊識  
瓶水奉花過珍惜日日讀書坐花側彩毫  
拂豔花如生枝枝不覺動顏色今來看花  
渴水濱花亦作態如  
相親牡丹開過絕代少天教此花爲替人  
紅綃百幅鋪滿地香

絲牽客太多事盤龍戲綵何繽紛焰如爐火燒晴雲三十一品  
皆瑰質安能齊向坐前出忽然一隊紫妃來此是化工得意筆  
其餘朵朵俱修飾金帶圍腰豈難覓看花作相代有人畢竟誰  
如韓魏國花聞此言亦歎息對我欲前覺羞澁凝睇屬意辭不  
得風光如錦足破寂東君去後春猶留花神竟有回天力笑我  
無言面花立索句苦爲花催逼到此春懷不能抑若將此花作  
傾城更比牡丹多丰情臨風搖曳如送迎若將此花作良藥兒  
女春容免蕭索可憐醫病不醫愁那管人間有沈約此花功效  
何必論遭遇當年不淪落君不見香山居士草詔來詞頭封罷  
花口開又不見元九題詩在花葉珊瑚風漾紅千疊自古芍藥  
推廣陵好花隨地爲廢興朱旛錦檻感盛事煙絲霧縠圍層層  
此地芍藥空白好種花人多惜花少花多轉不如芳草鬢殘香

色但留根惟恐花時折不早攜來杖頭三百錢換得名花枝  
千如此好景輕送卻可知長日方如年把酒問花花不語園中  
瓶內意何許廣陵明月小黃煙花事一般費辛苦我爲花歌花  
起舞但乞好風爲作主貴賤兩地各殊時仙姿窈窕無參差濃  
陰擁護天如幙鬪盡繁華春不知

印事

故國春風別竹梧蕭齋獨坐感離居偶因得句思尋友卻爲看  
花屢廢書五夜消磨人醉後一燈迎送夢回初明朝便踐龍眠  
約萬綠叢中擬結廬

葉種之闕戎招觀芍藥未赴作此以謝

婪尾春留更幾家當筵歌舞鬪繁華三生但少今宵福四壁眞  
同曉日霞入座共驚傾國艷爭名肯後廣陵花書生未赴羣仙

會惆悵香風燭影斜

城東口占

黃初人物憶譙東  
文采銷沉霸業空  
春草斷痕碑碣盡  
斜陽移照梵王宮

霽峯太守見惠花瓶甚多室中壁上芍藥揮遍晨夕對花偶然得句

名花插遍慰天涯  
春去何曾冷歲華  
遣興須當行樂地  
中年莫負及時花  
夜深繞屋皆香霧  
曉起推牕盡彩霞  
留得錦瓶顏色在  
足教離客懶思家

絕艷都歸四壁中  
休論淺紫與深紅  
情當一往春難管  
花爲頻看樣不同  
綽約自憐逢我晚  
嬌憨太露怕詩工  
樽前芳氣濃如許  
爭使香山酒不空

自州署移入志局留此別芍藥

客中我愧惜芳人一室珍留未了春小住已曾消艷福此來原  
不負花神生逢絕代緣非淺看到多情影亦真十日燈前無限  
意停樽可奈別離身

戴小麓索題四時行樂圖

戴郎擁書坐一室忽然妙境自空出示我一幅遣興圖想見四  
時好風日四時遣興非稀聞可憐忙殺紅羅裙寶珠爲飾名香  
熏洞房日日生朝雲一身行樂不自覺寸心消受難爲君紅桃  
爭春淡不得美人願與比顏色菱荷花好藏鴛鴦美人鬪色兼  
鬪香梧桐露清桂露冷月下人來立秋影梅花雪裏支曉寒髩  
雲綠壓紅衫寬瓊瑤妝束擅金翠紙上傳神兼艷思繪圖何患  
非神仙難得當時人少年卽今作客遊譙地翠黛珠裳感舊事

黃梅時節同買醉客牕一日費消磨圖中四時何易過

閏七夕

任霽峯太守置酒招汪稚泉廣文暨陳曉帆吳菊舫金霽  
嵐李篠峯彭循舫鄭杏江高桂堂孫仿山諸君並許靜山  
朗峯昆季齊集志局時硯香亦在坐稚泉曉帆篠峯硯香  
並二許皆卽席成詩因賦二律

聚散忽忽一月過黃姑重見意如何人間巧事原難再天上良  
宵不厭多佳話古今歸玉宇秋心前後併銀河書生久荷裁雲  
錦更乞機頭舊織梭

又報瓊霄露氣侵綵雲高處翠幃臨詩經此夕無餘巧天補前  
番未了心兩度秋光綠客艷三句河水爲誰深廣寒尙有神仙  
侶碧海年年恨到今

次日諸君各以詩來復成五律

一樣紅墻路雙星聚水旁巧從前度得秋到此宵長霜露沾衣  
冷雲霄費鵲忙已教兒女如況我客他鄉  
猶有初秋恨殷勤訴絳河縱目今夜會終是別時多巧積難醫  
拙歡加轉易過片雲今已厚莫認薄如羅  
多事天公戲安排此一回素娥勤送嫁白帝又爲媒錦織新詩  
樣花圍舊酒杯客中逢艷節都倩故人陪  
更莫多私語明河在上頭天開雙巧宴月是一般秋宿恨拋星  
斗增詩賀女牛神仙近人意此度足勾留  
不敢煩相乞天孫亦厭勞秋偏沿舊例巧慣累吾曹瓜果陳應  
倦仙橋架更高尙憐前度月留影照揮毫